



Karta Aberta Ba

Sua Exelénsia Primeiru Ministru Governu Konstituisiónál Da-IX

Kona ba Pozisaun Estadu Timor-Leste Defende Direitu Povu Mianmar

31 Agostu 2023

La'ó Hamutuk louva ho Estadu Timor-Leste ne'ebé firme tebes kondena ba asaun rejime militar Mianmar ne'ebé expulsa misaun diplomata Timor-Leste nian husi Mianmar tanba Estadu Timor-Leste defende justisa no demokrasia ba povu Mianmar. Ami, hanesan organizasaun sosiedade sivil ne'ebé defende demokrasia, direitu umanus, no solidariedade iha Timor-Leste no mundu tomak, sente orgullu tebes ho desizaun ne'ebé Governu RDTL foti liu husi afirmasaun husi Primeiru Ministru nian pedidu ba lider nasaun ASEAN sira atu diskute asuntu direitus umanus no demokrasia ne'ebé hetan atake husi junta militar iha Mianmar.

Pozisaun ida ne'e hatudu nafatin ita nia konsisténsia ba mundu oinsá ita tane aas prinsipiu no valór umanu ne'ebé seidak resolve hodi husik hela sofrimentu naruk ba povu Mianmar. Hanesan ita hotu hatene, konfliktu iha Mianmar ne'e kontra povu no sistema demokrátiku iha Mianmar; povu tomak inklui ativista, labarik, feto, grupu minoria no ema vulneravel sira terus ona iha tinan barak nia laran husi rejime ditadura militar.

Infelizmente, sidadaun sira iha Birmánia (Mianmar) sofre ona represaun dezde 1988. Iha 2005, La'ó Hamutuk organiza protesta kontra Shwe Gas Project ne'ebé viola comunidade nia direitu.¹ Iha 2009, ami apoiu Embaixadór Timor-Leste nian ba ONU Nelson Santos bainhira nia vota atu apoiu direitu umanu iha Mianmar no, infelizmente, hetan demisaun husi Dili.² Ami apresia RDTL nia pozisaun agora – atu dudu membru ASEAN atu apoiu direitu umanus iha Sudeste Azia (maske iha pasadu ASEAN sira apoiu Indonézia nia okupasaun ilegal iha Timor-Leste). Representante ida husi La'ó Hamutuk hasoru malu ho refujiadu sira husi Birmánia iha Tailândia iha 2010, no iha 2012, bainhira espasu demokrátiku loke uitoan, La'ó Hamutuk apresenta iha workshop ida kona-ba transparénsia iha setór petrolíferu iha Yangon.³ Infelizmente, dalan ba demokrasia iha Birmánia la kontinua, no iha 2017 ami tenke fó sai Deklarasaun Solidariedade husi Timor-Leste ba Komunidade Rohingya.⁴ Hafoin golpe militar iha 2021, ami, hamutuk ho OilWatch, ezije kompañia petrolíferu atu sai husi Mianmar.⁵ Agora, La'ó Hamutuk fó parabens ba Governu Timor-Leste ne'ebé tuir prinsipiu sira ne'ebé konsidera hanesan fundasaun ba ita nia nasaun.

Ami rekoñese povu Mianmar terus demais ona ba rejime ditadura militar ne'ebé akontese dezde 2021, asaun militar sira rezulta povu barak mak hetan oho no barak mak obrigatóriamente halai

¹ <https://www.laohamutuk.org/Bulletin/2005/Nov/bulletinv6n4.html#Burma>

² <https://www.laohamutuk.org/reports/UN/06UNMITcreation.html#Burma>

³ <https://www.laohamutuk.org/Oil/EITI/Burma/12EITIBurma.htm>

⁴ <https://www.laohamutuk.org/Justice/2017/SolidarityTimorRohingya11Sep2017te.pdf>

⁵ <https://www.laohamutuk.org/Justice/2021/Statement%20WSEA18April2021.pdf>

ba nasaun seluk hodi sobrevive. Rejime ditadura militár foti podér tomak, anula rezultadu eleisaun demokrátiku no hamosu krize umanitária oin-oin, ekonomia no polítiku. Maske violasaun direitu umanu iha Mianmar sai ona preokupasaun mundiál, maibé too agora seidak iha asaun internasionál konkretu ida hodi hapara forsa rejime ditadura militár ne'ebé kontinua buras.

Ami lamenta tebes ho pratika rejime kudeta militár iha país ne'ebé besik atu kompleta sira nia demokrátiku, tuir loloos hanesan país demokrátiku ida tenke husik ema hotu livre atu goza nia vida, la ho hetan ameasa husi governu ou órgaun estadu bainhira sira la kontra bandu ou kontra lei ne'ebé vigora. Maibé situasaun ideal ne'e nunca akontese iha Mianmar, povu Mianmar ho nia istória sofrimentu ne'ebé naruk lori too ohin loron.

Hanesan organizasaun sosiedade sivíl ne'ebé durante tau matan ba asuntu direitu umanu no demokrasia, La'ó Hamutuk apresia tebes pedidu husi Governu Timor-Leste ba lider ASEAN hodi enfrenta problema violasaun direitus umanus iha Mianmar. Komitmentu Governu nian hodi valoriza prinsípiu estadu de direitu demokrátiku, inklui hametin solidariedade internasionál ne'ebé klaru haktuir iha Artigu 10 konstituisaun RDTL hatete katak *Timor-Leste sei solidáriu ba Povu hotu ne'ebé luta ba libertasaun nasional*. Repúblika Demokrátika Timór-Leste fó azilu polítiku, tuir lei haruka, ba ema rai seluk sira ne'ebé persigidu tanba sira-nia luta ba libertasaun nasional no sosiál, defeza ba direitus umanus, demokrasia no dame. Prinsípiu legal hirak ne'e adopta ona ho ninia baze vitória istóriu ida hasoru opresaun, ne'ebé povu Timor-Leste rasik liu ona.

La'ó Hamutuk apoiu tebes ho pozisaun Governu TL lamenta ho pozisaun husi governu rejime militár Mianmar nian ne'ebé espulsa misaun diplomata liu husi reprezenta enkarregadu negósiu Timor-Leste iha Mianmar. Ne'e hatudu momoos rejime ditadura militár sei maka'as tebes iha Mianmar no impunidade kontinua buras.

Ami kontinua husu ba ditadura militár iha Mianmar atu hapara forsa ne'ebé haterus no tortura povu Mianmar durante ne'e. Sistema ditadura sempre uza podér no forsa no nunca hatudu vontade di'ak, nune'e atu halakon sofrimentu hirak ne'e, tenke brani troka ba dalan ida demokrátiku.

Husu ba lider nasaun ASEAN tomak atu labele taka matan no ignora sofrimentu barak ne'ebé Povu Mianmar hasoru tanba de'it interese komérsiu no polítiku. Husu ba Komunidade ASEAN, Sekretáriu Jeral ONU no nasaun boot sira atu foti medida imediatu no prudente liu no urjente duni tenke aplika sansaun ekonómiku, diplomátiku no polítiku hodi ajuda harii hikas Governu Unidade Nasionál (NUG) atu restaura demokrasia iha Rai Mianmar tuir prinsípiu Deklarasaun Universal Direitus Umanus.

Ami be saran lia,



Marta da Silva



Jonathan Gonsalves



Celestino Gusmão



Charles Scheiner



Mariano Ferreira



Elizabeth da Silva



Elizaria Febe Gomes